

豫

章

焚

書

第三冊

卷一

年

策

書

明倫彙編

龍雲先生文集卷十四

安成劉弇偉明

啟

謝發運張龍圖舉太學博士啟

右某伏蒙發運龍圖舉某充太學博士者需章亟上
申以古人特達至到之知翼舍傳驚指爲儒者發揚
光大之漸譽浮情外愧溢顏初竊以盛世所先博士
其選矩範後學羽儀眾經爰自秦漢張官以來蓋承
孔孟絕學之後秩比六百石員纔數十人茲號上庠
之游非徒他職之比大則天人之精祲能識小則師

友之淵源可知著蔡今昔之危疑黼藻皇王之憲度

公孫仲舒也或牧豕下帷以卒其業稚圭朱游也亦

解頤折角以成其名江公則世謂詩宗張憑則元作蓋

人穠理窟流略雖遠聲容若存是爲清塗何有非據

如某者蠹蟬末智技鼠短能從田偶脫於白丁規糈

殆成於倦客進既弗能而退或京本作又未可上則不足

而下則京本作或有餘一昨謝海邑之沉迷丐主司之披

拂兩殫京本作窘步四躡高躔翩然澤國之行尸此學

宮之責揣摩從事僅知戴聖之四興教育非工徒愧

孟軻之一樂而又身與病會齒將衰臨瘠嬰肺絡以

戰枯秋入顛毛而化綠再莽蒞止百謫樊然間則自
尤拱以待斥他日絕交之中散每取深憎當年獨冷
之廣文分迷初局豈徒孱瑣誤辱推褒茲蓋伏遇發
運龍圖連茹熙辰推轂末路弄轂借京本中央之所
舜陶移苦竄之資有味其言豫爲之地恥臧文之蔽
惠同公叔之升僎遂使平生漂泊之餘亦預當塗考
祭之獻某敢不夙宵迪檢新故剷精去其所性之不
存期於自信而後已孰謂澗溪沼沚之品京本或補
薦羞庶因胸脅腹背之毛終成羽翮過此以往未知
所裁卑情無任荷恩銜遇激切知歸之至

謝運判王司封舉太學博士啟

右某伏蒙運判司封舉某充太學博士任使者排清

漳

一作瘴

之病非岐扁之砭劑則無以起綿悞取太行

之道非良藥之銜勒則無以絕阻修然病客常見困

於折肱

京本作股

之家駟駿每興悲於按圖之市以方論

薦寧復懸殊惜哉公道之寂寥甚矣仕圖之旁午詭

時者右膏梁而左寒畯逐迹者崇勢利而羞賤貧用

鮑叔知管仲者其誰若臧文蔽展禽者皆是自非報

吾君而以士因是人之必求水鑑九流蘭茝十步觀

所主以至於爲主舉爾知而闕其不知論訛弗奪於

朋邪歆豔靡牽於流俗則何以有功推轂無愧征茅

如某者學海盤渦英躔末駕讀書皆輪扁竊笑之糟

粕得祿纔曾參及親之釜鍾往從例試

京本作吏試

之選

員偶寘僅完之膠舍訓說自效介愚弗移不知者謂

我何求無常者以儒爲戲開懷見誠磊落胷次任真

者如此而或不免於浸潤膚受寡儔少與屏棄外物

京本作物求

畏事者如此而或見病於蓬蔕戚施歲晚晚

而景淹留神怵迫而思紆鬱貌先悴以收渥髮迎憂

而送華孰憐江滸之戲麋姑聽衛人之煬竈敢希題

品爰被屏庸旣刻之以粹純溫潤之章又挽之以發

揚光大之漸茲蓋伏遇運判司封山玉移潤秋陽借
輝軒軒吾道之主張炯炯此心之明白使扶盧直鑄
無有於廢材而治解播精亦得以攘臂有所謂公無
私者必本之賢不肖焉某敢不撰念京本清冰撫躬
害馬低昂物變吮嗽聖真抽白簡以寄崦嵫哦青矜
而慨城闕且華陰之土拭劍已拔塵京本作沈蹤而海客
之槎到天庶非虛覲過此以往未知所裁卑情無任
云云

代李令謝舉升擢啟

得邑海壖竊食浸聞於冒昧論材宸陛飛章忽預於

鑄評賜越溢以驟加愧茫洋而交集且古之設官也

以當職爲務而縣之有令也蓋得人尤難委之或輕

弊亦隨至厥惟西門子賤之既往問以中牟洛陽之

嗣興長才比肩健吏方駕卓爾擅故家餘

京本作遺俗之

美休然有君子長者之風敏手運於擾擾之末流利

刃游於恢恢之餘地廉遜修而爭訟息篤實長而薄

惡消仁興未冠之童暴革不羈之獸烟火相臨

京本作隣

之郊而無犬吠之警麻麥微步之逕而有雉馴之娛

洪惟我朝尤慎茲選或給札於遣行之日以諭其意

或榜詔於視治之地以要其能桑榆舒樂歲之暉灌

漑裨時雨之潤罷庸不振者至俟之以黜責而去不
旋踵強果自效者或拔之倥偬而起如奮毛朝躋墨
綬之下陳夕駭朱轡之華觀雖由三歲之綿歷亦有
一昔之階緣自非物論奄歸官箴彌惕平日去偷脫
苟簡之累大吏加特達至到之知則何以上當薦延
坐俟驅策如某者侏儒散質樗櫟下材偶緣世及之
私遂獵俸餘之養視營營而若喪期效一官歲冉冉
而不留行逾二紀乏剴劇撥煩之敏貽包羞尸素之
譏綆以深汲而亟窮燭或小明而鮮繼士元驥足孰
敢自名言偃牛刀初不知措效顰無補失伍幾多方

虞瘕曠之徹聞豈意獎憐之誤及貂不足而續狗尾
雅旣終而奏鄭聲茲蓋伏遇某官格物以公不以私
事君以人不以己泰茅引類鄒律敷和成裘無間於
貂蟬構廈弗遺於楮楔急其小善被之先容某敢不
亶亶率循兢兢迪畏孰謂修途之步更託其初庶幾
順風之呼卒因於勢過此以往未知所裁

代回廣州蔣待制啟

伏審光奉渥恩進聯法從伏惟慶慰竊以儒臣妙選
延閣清班宸翰粲於奎鉤寶構矗於天漢稽故事以
張局緣美名而命官舊稱華塗最重昭代厥拜嘉寵

莫先高流恭以某官識際幾初學臻聖處筆端泛灑
如合膚寸於泰山襟韻曠夷能吞八九於雲夢五車
經目以殆盡三第比歲而連收暫歷烏臺梟鸞自判
晚更龍節貫粒取盈一昨輟局淮壖偃藩嶺服方詩
書而謀元帥俄尊俎以折還衝妖巢殄覆以無邊秋
杅寂寥而不警歲纔一閱績已四聞雖望之意在本
朝尙紆民寄而薛宣身兼數器素結主知果副推褒
亟躋巖近正應不測之大用宜亦可料於此行首沐
沖私過騰柔翰永言銘篆交迫悃悰

回廣州蔣待制啟

伏審祗奉明綬榮升內閣伏惟慶慰竊以儒臣之選
待制乃達官御書所藏寶文爲近事上做龍圖天章
之號至比金馬玉堂之游文物相望於百年將相此
出者大半自非擅天下譽結人主知則何以驚疑厲
昌辰雍容法從恭以某官學臻聖闡望藹朝紳智其
存物之所爲厚也有功而不德椽筆馳騁連捷三科
輶車光華荐更數路霜臺舊傾於風采澤國晚最於
輸將頃者加直禁廬出藩南服殄披猖之妖黨奪氣
魄於裔蠻徼柝夜沉海瀾秋晏龔遂之出爲渤海固
欲安之汲黯之卧治南陽今君召矣果躋清切俾究

將明以是知公論所歸斯可爲大用之驗某阻趨旌
檠竊快風雲曲踊茲多誦言曷旣

代賀發運朝請啟

右某伏審祗膺明陟榮總計權伏惟慶慰恭惟某官
器幹淹詳聲猷藹茂東天子之眷知爲有舊閱生民
之利疚爲已多西指陝郊劇部方新於泥檢南還淮
服故吏重識於芝眉光華六路之提封絡繹萬艘之
轉餉隆最佇成於入奏清班別副於寵陞某幸以瑣
材猥居屬部悵鳬趨之尙阻起螽躍以居深式屆高
秋冀精視履

代起居李公擇

竊伏台符荐更歲籥名弗通於紹介迹初遠於門墻
恭以某官雅量鎮浮沉謀詣極翱翔瑣闥青雲何啻
於二十年酣疑泳眾家藏書殆逾於數萬卷力張忠
膽以許國加有愛心之在人方且階次於民曹行見
指期於釣席某屬當嚴總居竊隆休未申伏闕之私
第結蔭雲之想歲陰茲晏治府方遙尙覲保綏式符
倚注

代與文龍圖啟

欽風有自展敬無從跂墻仞之崇隆覺魂爽之飛越

恭以某官著蔡王度箕裘相家藹茂聲猷高出近古
慷慨忠義度越眾人翹然廊廟之材焯是圖書之府
行膺睿柬早正鈞除下副輿情力張元化某因循歲
月飄泊江湖未申伏闕之私徒結蔭雲之想微和式
屆尙冀節宣

賀范發運啟

伏審肅將使指總制邦儲六路盡入於提封雙節載
華於初命伏惟慶慰恭以某官臯稷帝世韋平相門
朝推氣尙之激昂眾識事爲之開濟果膺乃眷亟有
此除劉晏資半菽之饒韓華條屯邊之利用方盛際

宜愧後功流馬木牛更衍萬倉之紅粟鸞坡鳳城別
回一日之青雲某承乏江干竊輝淮服悵鳬趨之莫
遂第山仰以交深

問候潁昌府曾資政啟

緬邈東南猥將使指侵尋歲月阻奉台規跂牆仞之
崇隆覺魂幹之飛越恭惟某官星躔符彩嶽鎮炳靈
經國壯猷蓋嘗羞比於管晏傳家盛業不復多謝於
韋平頃輟煩機寢更外補雖古諸侯之任暫屈於遠
圖而舉天下之情猶欲其再相想符夢肖亟處師瞻
庶期蒲柳之衰姿亦齒鈞鎔之故物春容晚晚邦政